



PRIMA SESSIONE URDINARIA DI U 2019

1ère session ordinaire de 2019

28 è 29 di Marzu

28 et 29 mars

2019/O1/015

Question déposée par Vannina Angelini Buresi au nom du groupe Corsica Libera

Objet : *espaces stratégiques agricoles*

Sgiò Presidente di l'Esecutivu,

A terra corsa ùn hè à vende. Cusì avemu dettu anni è anni. Cusì dimu è diceremu sempre. A terra corsa deve prудuce ricchezze, deve nutrisce l'omi. Cusì dimu è diceremu sempre. Per avà, nutrisce l'ingordi chì si techjanu di cimentu.

Cù a forza di u dirittu, a cartugrafia di u PADDUC si duvia sustituisce à i sacrificii di i militanti di u Fronte di Liberazione Naziunale di a Corsica. Permettite mi di pensà à elli, di salutà li tutti. Cosa serebbe diventata a Corsica senza elli ?

Oghje, a situazione hè ancu peghju chè in u mentre di l'anni settanta. U Fronte ùn hà pusutu parà tuttu ma hà limitatu di danni, cuscentizatu u populu è permessu di pruteghje a Corsica. U dirittu pare incapace à fà ne altrettantu.

L'associ si sò impegnati assai dinù. Li vogliu ringrazià dinù ! Ma oramai s'aspetta assai di più da a nostra cullettività.

Pensu à i giovani. Chì missaghju li mandemu ? A Corsica ùn deve mai più vultà à l'ore dure è aspre di a lotta clandestina. A bettunizzazione in corsu di parechji Spazii Agricoli Strategichi (ESA) deve esse parata da a forza publica, solu da a forza publica.

Aviate scrittu in stu sensu à a prifetta di Corsica di ghjugnu scorsu chì s'era ingaghjata à mette in anda un controllu strettu di l'appiecazione di u PADDUC in i spazii agricoli.

Di l'infurmazione chè no buschemu, i permessi di custruisce vanu criscendu, ch'ellu si fia u cuntrollu di legalità. Cunsidaremu noi chì u statu, i so ingaghjamenti ùn li hà micca tinuti.

A so rispunsabilità hè trimenda.

È di i nostri l'ingaghjamenti, à chì ne semu ?

Fin'di lugliu 2018, hè statu prisintatu u raportu di mudifica di u PADDUC da ristabbilisce a carta di i spazii strategichi agriculi. Parechji amindamenti sò stati prisintati è vutati. Era privitytu a messa in piazza di un COPIL per seguità i travaglii ingiru à a carta di l'ESA è un calindariu di travagliu.

À chì ne semu oghje ?

A prima riunione di u COPIL era almanaccata per u 30 d'ottobre scorsu è a delibera di u cunsigliu esecutivu arristendu u prugettu di cartografia nova per mezu nuvembre. A fine di a procedure per a fine di lugliu di u 2019.

Da quì à qualchì ghjornu saremu d'aprile. È u tempu corre...

Mentre a vostra presa di parolla avete dettu, è noi dinù, di modu chjaru ch'ellu ci vularebbe à fà usu di i mezi ghjuridichi à a nostra dispusizione sè ù statu faltava. Chì ne pinsate di st'uzione di pettu à a situazione ughjinca ?

O sgiò Presidente di l'esecutivu, u statu deve tene i so ingaghjamenti è rispittà a so parolle è u so scrittu. È à noi ci tocca à tene i nostri l'ingaghjamenti quand'è n'avemu u putere di fà. Allora insieme femu da ch'ellu piantessi stu scumpientu, da pruteghje ciò chì l'antichi ci anu lasciatu, da sviluppà è assicurà l'avvene di i nostri zitelli chì averanu sceltu di sfruttà è campà di a so tarra.

Avemu bisognu d'un missaghju chjaru da a vostra parte à i speculatori, à i merri, à i giovani dinù.

À ringraziavvi.